



17 JUN, 2025

MOU tumpu peraturan, keperluan teknikal

Sinar Harian, Malaysia



MOU tumpu peraturan, keperluan teknikal

KUALA LUMPUR - Memorandum persefahaman (MoU) Grid Tenaga ASEAN (APG) yang dipertingkatkan, dijangka dimuktamadkan menjelang akhir tahun ini akan memfokuskan kepada penyeragaman peraturan dan kawal selia, menyelaraskan keperluan teknikal dan mewujudkan model kewangan.



FADILLAH

Timbalan Perdana Menteri, Datuk Seri Fadillah Yusof berkata, MoU yang dipertingkatkan itu akan membuka jalan bagi pelaksanaan di bawah kepengerusian Filipina pada tahun hadapan.

“Oleh itu, ini adalah perkara yang perlu kita berikan tumpuan. Jika kita dapat mencapai persetujuan mengenai tiga isu utama ini, diharapkan pada tahun depan ia dapat diterjemahkan kepada tindakan,” katanya semasa sesi plenari menteri bertajuk ‘Memperkasakan Ekosistem Tenaga Masa Depan Asia’ pada Persidangan Energy Asia 2025 di sini pada Isnin.

APG yang diperkenalkan pada 1997 adalah inisiatif di seluruh rantau untuk menghubungkan infrastruktur elektrik antara 10 negara anggota ASEAN yang menyasarkan untuk mencapai operasi grid bersepadu sepenuhnya menjelang 2045.

Fadillah yang juga Menteri Peralihan Tenaga dan Transformasi Air berkata, Malaysia sebagai Pengerusi ASEAN pada 2025 terus meningkatkan kesalinghubungan tenaga serantau dan mempercepat pembangunan APG.

“Vietnam, Kemboja dan Laos mempunyai hidrokuasa dan angin. Malaysia mempunyai solar, dan Indonesia mempunyai tenaga lautan.

“Jika semua negara ASEAN bekerjasama dengan populasi kita yang besar dan gabungan sumber tenaga, kita boleh menjadi antara pembekal tenaga boleh baharu yang terkemuka di dunia,” katanya.

Selain itu, beliau berkata, ASEAN sedang mempertimbangkan keperluan untuk pengawal selia serantau memperkemas pembangunan dan memastikan peraturan yang seragam dalam kalangan negara anggota.

“Satu daripada idea sedang kita kaji sekarang adalah sama ada kita memerlukan apa dikatakan sebagai pengawal selia ASEAN. Oleh itu, kita mempunyai satu entiti yang melihat perkara ini dari sudut pandang semua anggota ASEAN,” katanya. - *Bernama*